

***Regional News Unit  
AIR Aizawl***

**Date – 17/09/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

1. CM Pu Lalduhoma chuan Kawnpui leh Khamrang inkar kawng siamthat hna thawh nghal tum a ni a ti.
2. Aizawl leh Silchar inkar kawngpui a chhiat lutuk avangin tuialhthei phurtute nawrh an tum chu thulh mahse, kawngchhiaah oil tanker tangkhang a tam avangin ngai a la awl thei lo.
3. Jammu and Kashmir inthlan thawh khatna a tana campaign hun chu nizan khan a tawp a. Naktukah vote thlak a ni ang.
4. Prime Minister Narendra Modia chuan nimin khan Ahemdabad Metro thawh hnihna chu Sector 1 Metro Station Gandhinagar atangin a vailiam.

<><><>

**CM MEETING**

Chief Minister Pu Lalduhoma chuan Kawnpui leh Khamrang inkar kawng siamthat hna thawh nghal tum a ni a ti.

Nimin khan amah hmutu Mizoram Commercial Vehicle Union hruaitute hnenah Chief Minister chuan, kuminah India ramin ruahtui kan dawng tha a, tuilian leh leimin a tam a ni a ti a. Chhiatna pawh a thleng nasa-in kawngpui then fel nan pawh hian sum leh pai a kal tam hle. Hei hi sorkarin a tum anga hma a lak chak theih loh chhan ber a ni, a ti a. Ruahtui vanga sorkar harsatnate hriatthiamsaka lo ngaichang hram hram tura ngenin sorkar hmalak dan te a lo hrilh a. Kawnpui leh Khamrang inkar hi chu remchang hmasa berah amah ngeiin tlawh a tum thu a sawi a. Tuna Mizoram chaklakna kawngpui chhe zual lai Kawnpui leh Khamrang inkar hi Satguru company-te thawh a ni a, maintenance period-ah a lut mek a, May 2026 thleng awl tur a ni. An maintenance period a nih miao avangin NHIDCL in a laksak duh si lova, tun hi a thleng ta niin sorkar thuchhuah chuan a tarlang.

Sawrkarin an contract tihtawpsakin an maintenance fund awm ang ang hi nimin khan Mizoram PWD account-ah a luh beisei a nih thu leh chu'ng sum leh state sumte nen chak taka umzui a ni a. Hnathawktu hi hlawm thumah dah an ni a, niminah pawh khan lung trip 20 an thlen hman ang tiin thuchhuah chuan a sawi baw. Tuna maxicab service te an chawlhna chhan kawng chhe lai zawng zawng hi lung hnawha tlan theiha a rang lama siam tura an ngenna chu a theih chen chen bawhzui nghal a ni dawn a. An inkawmhona-ah hian Kawng chhia vanga maxicab service chawlhna te a rang lama inhrilhhriat ni se, an ti. Manipur chaklak luhna Kawlkuh leh Hliappui inkar kawng hi sawrkar chuan PMGSY thawh 3-na hnuaiyah siam thar vek turin contractor thar kutah a hlan tawh a. Tuna lung hnawh nghal ngai leh lirthei tang nawrchhuaktu tur lei laihna khawl pawh contractor hnena ngen tha an ti.

Commercial Vehicle Union hruaitute hian kawngpui that tawh loh vanga harsatna an tawh bakah tuialhthei man sang chungchangte, lirthei kaihnawih chhiah chungchang te, fitness test thu

leh state dang atanga private car hmanga rinhlelawm taka rawn vak vel an tam thu leh a ngaih pawimawh thil dangte an thlen bawk a ni.

**(DIPR)**



#### **OIL SCARCITY**

Mizoram chaklakna ber Aizawl leh Silchar inkar kawngpui a chhiat lutuk avanga tuialhthei phurtute kawnglakah rei tak tak an thang avangin harsatna a thleng mek.

Silchar leh Aizawl inkar kawngpui, a bikin Kawnpui leh Khamrang inkar a chhiat lutuk avangin tuialhthei leh bungraw phur truck engemawzat a tangkhang mek a. Lirthei che vel a khawtlai avangin Aizawl khawpui leh hmun hrang hrang leh khawpui hrang hranga filling station-ah petrol leh diesel a tlem sawt hle a. A lirthei len leh tet a zirin an sem rual mek a ni. He tih lai hian tuialhthei phurtu pawl Mizoram Oil Tanker Driver Association (MOTDA) leh Petroleum Entrepreneurs and Transporters Union of Mizoram (PETUM) tun hnai a thukhawm chuan thuchhuah siamin, Kawnpui leh Sairang inkar kawngpui chu tualhthei phur te tan chetsual hlauhawm khawpa a chhiat avangin, lirthei khalhtu leh mipui te him tlan nan leh chhiatna nasat zawk pumpelh a nih theih na'n vawiin atang hian tiam chin awm lova tuialhthei phurte tlan loh an tum a, amaherawhchu Chief Minister te nen an inbiak hnuah an kaltlangpui rih lo a ni. Hetiang boruak a nih leh tak avang hian filling station a tuialhthei la tur an intlar thui thei hle a ni.

Akashvani Aizawl-in nimin khan Aizawl Filling Station hrang hrang a tlawh kual a, Filling Station neitu tam zawk chuan tun dinhmunah Petrol leh Diesel hralh chhuah tur an neih tlem tawh thu an sawi. Aizawla MIZOFED hotute sawi danin, tun dinhmunah tuialhthei kawlsa (stock) an nei tlem tawh a. Petrol Extra Premium (XP) leh Diesel Freesale an kalpui mek chu nimin tlai dar 3 thleng daih vel chauh a ni.

District hrang hrangah pawh Tuialhthei hi a vang chho mek a, Lungleia Petrol pump pali awm zinga thenkhat chu a inkhar tawh – hralh tur nei chuan lirthei ke hnih nei tan cheng 200 man zelin an pe chhuak. Champhai, Kolasib, Serchhip leh Hnahthialah te pawh Tuialhthei awmchhun hi khairual zawka mipui ten an chan theih na'n a pek chhuah danah thuneitu ten ruahmanna an siam a. District thenkhatah erawh chuan tuialhthei pek chhuah danah khuahkhirhna hi an la ti chhuak lo a ni.



#### **AGRI WHOLESALE MARKET**

Agriculture & Farmer Welfare minister Pu PC Vanlalruata chuan Aizawl kawtchhuah hmun pahnihah Wholesale Market sak a nih tur thu a sawi.

Chanchinbumite a kawmnaah Pu PC Vanlalruata chuan, Agriculture department hmalakna hnuaiah Aizawl kawtchhuah hmun pahnihah thlai thar zawrhna tur, agriculture produce wholesale market sak a ni dawn tih sawiin, hemi atan hian pawisa pawh tih fel a ni tawh niin a sawi. Pu PC Vanlalruata chuan, Sihphir leh Melriatah a sakna tur hmun an ruahman tawh tih sawiin. Thlai zawrhna hmun tur sakna tur hian Mizoram sorkar chuan cheng nuai 1,000 an nei tawh a, cheng nuai 500 ve ve hmanga sak tur a ni ang, a ti.

Agriculture Minister sawi dan chuan Market Building drawing an buaipui mek a, Drawing peih a nih hunah tih tur tulte an ti ang a, building sak hna tan nghal a ni ang. Aizawl chhak leh thlang lama kawtchhuahah pawh Wholesale Market sak tum a nih thu a sawi bawk.

Agriculture produce wholesale market-ah hian thlai thar vawn thatna tur cold storage, kut hnathawktute hahchawlhna (rest room) bakah, ATM booth-te dah tum a ni.



#### **SHC POLLS**

Sinlung Hills Council inthlan vawi 2-na chu kumin November thla bul lam hian buatsaih tura ruahman a nih thu dawn a ni.

Inthlanna buatsaihtu tur State Election Commission chuan kar kalta Zirtawpni khan Sinlung Hills Council inthlan vawi hnihna lo awm tur atan hian returning officer leh assistant returning officer 12 ve ve a ruat fel tawh a. Electoral roll pawh buatsaih mek a nih thu State Election Commissioner Dr. H. Lalthlangliana chuan Akashvani Aizawl a hriih. A hun tur chiah a la hriat theih loh chungin October thla chawhma lam hian inthlan hun tur hi puan a nih rin a ni. Sinlung Hills Council hi April ni 2, 2018 a Mizoram sorkar leh HPC (D)-te inremna anga Sinlung Hills Council Act, 2018 hmanga din a ni a. Member thlan 12 awmna Sinlung Hills Council hmasa ber chu November ni 5, 2019 khan lakluh a ni a. Member thlan 12 bakah a ruata ruat member 2 an

awm bawk. He council-ah hian chief executive member (CEM), executive member (EM) pali bakah chairman leh deputy chairman an awm bawk a ni.

<><><>

#### PM-POSHAN

Lawngtlai District South Lungpher Govt. Middle School-I chuan zirlai naupangte hriselna tur ngaihtuahin, chawhchun atan eitur hrisel leh tha an sem chhuak.

Govt. Middle School-I, South Lungpher Headmaster Pu N. Lalrammawia chuan Pradhan Mantri Poshan Shakti Nirman hnuai chawhchun kalpui mek ah, Sorkar laipuiin a beisei leh a duh angin zirlai naupangte chu chaw leh chawhchun ringawt ni lo, thlai leh thei an sem thin thu a sawi a. Chawhchun atan thei leh thlai te chu awlsam taka hmuh theih a nih loh avangin mimal inphal te hnen atang sem tur an dawn thin thu a sawi bawk.

South Lungpher Middle School-I ah hian zirlai 65 an awm mek a, zirna piah lamah kut themthiamna lam te, inchhung khawsak rel nana pawimawh hrang hrangte naupangte zirtir niin, taksa sawizawina lam te pawh uar taka kalpui thin a ni.

#### (Lalnggheta Ralte, PTC Lawngtlai)

<><><>

#### BORDER TRADE

Myanmar atanga dan kalha kuhva lo lut ni a sawi CBI-in an chhui dawn tih chhuanlam a Zokhawthar Indo-Myanmar border trade centre a insumdawn tawna tihtawp a nih avangin ramri a awmte'n harsatna an tawh.

Gauhati High Court thupek angin Myanmar atanga dan kalha kuhva lo lut ni a puhna chu Central Bureau of Investigation (CBI)-te'n an chhui dawn a, hemi ti tur hian Zokhawthar CBI-te an kal dawn avangin insumdawn tawna hi Customs official-te chuan July ni 25 khan an titawp vek a. Zokhawthar village council president Pu Lalmuanpuia chuan CBI te hi August thla bul khan an thleng chhova, Champhai nen kartawin rei vak lo an cham a, an haw leh mai niin a sawi a. CBI ho haw hnu pawha ramri a chengte thil lei leh hralh khap zui a ni chu an lungawi loh thu a sawi a. An bialtu MLA Lt. Col. Lalhmingthanga'n dan hmanga insumdawn tawna chhunzawm phalsak leh ni se ti a a sawi pui pawh Customs leh Assam Rifles lam hian an zawm lo niin khawtlang hruiatute'n an sawi a. Tun dinhmunah Zokhawthar leh a chheh vel khua-ah eichawp leh nitin mamawh thil a vang tawh a, a awm chhun pawh a man a to tawh hle niin an sawi a ni.

Ramri a insumdawn tawna tihtawp a nih avang hian dawr neite bakah puakphur (bungraw hlangtu) 500 dawn chu hna nei lovin an awm mek a. Bungraw phur leh mihring phur lut leh chhuak an awm meuh loh avangin thingpui dawrte pawhin dawrtu an nei tawh mang lo niin an sawi bawk a ni.

Zokhawthar leh Khawmawi inkara insumdawn tawna tur Zokhawthar border trade centre a Land Customs Station hi khatih laia Union Commerce Minister Nirmala Sitharaman chuan March 25, 2015 khan a hawng tawh na a, mumal taka ram pahnih insumdawn tawna hi kalpui a la ni lova, sumdawnna tihtawp a nih hma kha chuan mipui mamawh leh chakkhai erawh chu an inlei tawn reng thung a ni.

<><><>

#### ASF UPDATE

African Swine Fever (ASF) vawk pulhri leng avanga nimin a vawk thi chu Pathianni lam aiin a pung leh a, Pathianni-ah 27 a thih lain niminah chuan district 5-ah vawk 43 thi chhinchhiah a ni.

Animal husbandry and veterinary department hotute hnen atanga thudawn danin heti hian kumin February ni 9 a Champhai district Leithum khua a ASF vawk pulhri avanga vawk thi finfiah a nih atanga nimin thleng khan vawk 12,580 a thi tawh a. Tun dinhmunah khaw 236 chu ASF vawk pulhri lenna khua a puan mek a ni. Nimin khan district 3-ah vawk damlo 76 suat a ni a, hemi tiam hian kumina vawk pulhri darh zel tur venna atana vawk suat zat chu 21,664 a tling tawh bawk a ni.

<><><>

#### MIZO WINE

Mizoram Baptist Kohhran leh Champhai Grape Growers Society te chuan nimin khan sacramental wine in dawr tawna tur chungchangah inremna thuthlung an ziaik.

He hun hi Tlangsam a Champhai Winery hmunah hman a ni a, Champhai Grape Growers Society chairman Pu HS Lalfakzuala'n kaihruai a. Hemi hnu hian Sacramental Wine indawr tawna tur atan Baptist kohhran leh Champhai Grape Growers Society chuan inremna thuthlung an ziaik a ni. Baptist kohhran leh Champhai Grape Growers Society te sacramental wine indawr tawna chungchanga inremna an ziah hi a vawi 4 na niin, inremna vawikhat hian kum 2 a awl thin a, tun tum inremna an ziah hian kum 3 a awl thung dawn a ni.

**(Lalhlupua, PTC Champhai)**

<><><>

#### **ASSEMBLY ELECTIONEERING**

Jammu and Kashmir inthlan thawh khatna a tana campaign hun chu nizan khan a tawp a. Naktukah vote thlak a ni ang. Inthlan thawhkhatnaah hian candidate 219 awn awm dawn a. Voter nuai 23.27 vel awmin an zingah hian thalai vote nei ni nuai 5.66 vel an awm a ni. Assembly inthlan thawh khatnaah hian Assembly bial 24 ah vote thlak tur niin district pasarih ah inthlan buatsaih a ni dawn a. Heng zignah hain Anantnag, Pulwama, Shopian, leh Kulgam bkah Jammu division ah Doda, Ramban, leh Kishtwar te an tel a ni.

Heti hian Haryana-ah pawh Assembly inthlan atan political party te ngawrh takin an campaign mek a. Thlaleh October ni 5 hian Haryana Assembly seat 90 ah vote thlak a ni dawn a. Prime Minister leh BJP hruaitu senior Narendra Modia chuan vawiin khan Haryana Assembly inthlana an party campaign a hawng a ni.

Jammua & Kashmir leh Haryana inthlan result te hi thlaleh ni 8 ah chhiar a ni ang.

(Newsonair)

<><><>

#### **PM**

Prime Minister Narendra Modia chuan nimin khan Ahmedabad Metro thawh hnihna chu Sector 1 Metro Station Gandhinagar atangin a vailiam. Pu Modia hian Sector 1 atang hian GIFT City thelng a chuang ve a. Nimina hawn thar metro line hian Ahmedabad atangin Gandhinagar leh GIFT City te a thlunzawm a ni.

Hemi hnu hian PM Modia hian Ahmedabad-a GMDC khelmual atangin hmasawna project hrang hrang cheng vaibelchhe 8000 hu hawna leh lungphum phumna hun a hmang bawk a ni.

Pu Modia hian Pradhan Mantri Awas Yojna Gramin hnuiaia chenna in 30000 chuang sakna tur sum a pechuak bawk ani.

(Newsonair)

<><><>